

MIZORAM PRESBYTERIAN CHURCH

(Presbyterian Church of India)



SYNOD SOCIAL FRONT

(Registered as Charitable Society under the Societies Act XXI of 1860,
Aizawl, Mizoram Vide No. SR 16 of 1987)

Synod Office, Aizawl – 796001, Mizoram, India

MS/SF – 7/2021/63

Date 9.11.2021

To,

The Secretary

Mizoram Presbyterian Kohhran

..... Pastor Bial

Subject : World AIDS Day thuchah thawh darh tura ngenna.

Rawngbawlpui duh tak,

Kan Lalpa Isua Krista hmingin chibai ka buk a che.

Synod Social Front Committee chuan kum danga kan lo tih thin angin kuminah pawh
World AIDS Day, Dec. 1, 2021 pual hian thuchhuah siam ni se, Kohhran tinah chhiarchhuak
tura ngen ni se tih angin World AIDS Day thuchah ka han thawh a. Khawngaihin in Bial
chhung Kohhran hote min lo hriattira min lo thawh darh sak turin ka ngen che a, min
tihlawhtlinsak chuan ka lawm hle ang.

I rawngbawlpui

(REV. K. LALRINMAWIA)

Executive Secretary

i/c. Synod Social Front, etc.

Synod Office, Aizawl.

Memo No. MS/SF – 7/2021/63, dt. 9.11.2021

- Copy to :
1. Pastor Incharge, Bial, alo hriat atan
leh a tul anga min lo bawhzuisk theih nan.
 2. Secretary, Kohhran, alo hriat atan keh Kohhrana
min lo chhiarchhuahsak theih nan.

(REV. K. LALRINMAWIA)

Executive Secretary

i/c. Synod Social Front, etc.

Synod Office, Aizawl.

WORLD AIDS DAY THUCHAH

December ni 1 hi kum 1988 atang khan Khawvel pum huapa HIV darh zel tur venna leh a vei mek te'n inenkawlina tha an dawn theihna tur te, AIDS avanga nun chan ta te sunna lantirna atana ni pual bik 'World AIDS Day' atan hman thin a ni a. Hemi ni pual hian khawvel hmun hrang hrang atanga bawhzui tur Thupui thlan chhuah thin a ni. Kuminah hian "End Inequalities, End AIDS, End Pandemic" **"Intluk tlan lohna, AIDS leh Hripui te lo tawp vek tawh rawh se"** tih hi UN AIDS-in thupui atana a thlan chu a ni a. UN AIDS hian kum 2030 ah chuan AIDS hi khawvel atanga um bo emaw khuahkhirh theih tawh inbeiseiin ruahmanna a siam ut tawh nghe nghe a ni.

Tun tumah hian thupui sawifiahna leh a bawhzui dan tura ruahmannate kan sawi vek hman lo ang a. Kan dinhmun mila thuchah kan buatsaih hi i lo ngaithla ang u.

HIV/AIDS do tur leh hri vei (Positive) te tanpuia, hri darh zel veng turin National Aids Control Organisation hnuaiah Mizoram State Aids Control Society (MSACS) chuan hma a la reng a. An ni bakah hian Kohhran leh NGO hrang hrang ten hma an la reng baw. Mizoram hian HIV/AIDS chungchanga hriat tur leh kan tih turte inzirtirna hi kan dawng tha hle. Keini aia dawng tha leh thawk nasa hi an awm bik lo hial ang. Chuti chung chuan India rama HIV/ AIDS pun chak berna State kum tam tak chhung kan ni tawh. Eng vang nge?

Aizawl khawpui chauh pawh hi thlir ila, a tiat pui khawpui dang nen khai khin ila – Zu leh Ruihhlo avanga harsatna tawkte enkawlina (Treatment Centre) awm tam berna a nih ngei a rinawm. Chung Treatment Centre kan neihte chu seat awl awm lovin a khat reng vek a. Nu leh pa ten treatment centre-ah awm se an tih, an dah luh theih loh leh dahtu tur nei lo, veng hrang hrang leh khaw tam takah an la awm theuh baw.

Kum khat leh a chanve vel Covid-19 avangin kan inkharkhip a. Biak in kan khara, zirna in zawng zawng, intihhlilma hrang hrang, dawr zawng zawng, puipunna chi reng reng kan khar vek a. Mahni in chhunga tawm reng tura ngaih kan ni. Chuti chung chuan Kohhran inkhawm a awm theih zeuh karah kohhran tin mai hian thunun puan tur kan nei deuh reng hlawm. HIV/AIDS punna pawh tlahniam tura beisei a nih lain a tlahniam vak chuang lo baw.

HIV/AIDS a pun chak bik riauna State kan nihnaah hian a chhan puh tur dang hi a awm lovin a lang. A chung a kan dinhmun kan sawi atang khian a Chiang mai. Kan thalaite hi Zu leh ruihhlo hrang hrang salah an tang nasa em a, mipat hmeichhiat inhman tawna kawngah kan inthlahdah hle tih hi phat rual a ni lo baw.

Mizoramah HIV/AIDS Positive hmuhchhuah tam berna chu Sex (mipat/hmeichhiatna) atangin a ni a. A pahnihna chu Drugs (hriau thianghlil lo) inhman tawmna atangin. A pathumna chu Nu nau paiin a fa a kaichhawn hi a ni. A pathumna phenah pawh hian zu, drugs leh sex hman khawloh hi a chhan lian tak a la ni cheu.

Tuna kan awm anga zu leh ruihhlo lakah kan fihlim loh a, nupa kar ni lovah mipat hmeichhiatna laka kan inthlahdah zui zel a nih chuan HIV/AIDS pun chak ber-na State hi kan ni reng ang a. Thalai hna thawk tur a beiseite hna thawk thei lo mai pawh ni lova enkawl ngai zawk an pung zel ang a, kan ram hian retheih kan hmabak dawn a ni. Chumai bakah Mizote kan tlem a, pun kan mamawh kan tih mek laia zu leh ruihhlo leh HIV AIDS avanga thalai nun chan an tam lutuk chuan hnamdangin min chimral mai ang tih pawh a hlauhawm thei.

Hriat tur pawimawh te lo tarlang ila:-

Hri inkai chhawn theih dan te, positive te enkawl dan te kan ngaihthlak fo tawh avangin chipchiar taka sawi hman a ni lo bawh a kan hriat tur t̃ul zual, sawi zau lovin tawi te te-in han sawi ila.

- 1) HIV/AIDS hi inkaichhawn theih natna a ni a, hri leng erawh a ni lo. Hri kai tur chuan a hri kai tawh te nena mipat hmeichhiatna hman emaw an thisen hi a la kai ve lo taksaah a luh ngei ngei a ngai. Chuvangin thianghlim taka nung t̃hinte tan kai ve hlauh ngawt a t̃ul lo. Amaherawhchu tunah chuan kan inchiahpia tak em avangin kan nun kan fimkhur erawh a t̃ul.
- 2) HIV/AIDS hi natna chi khat a ni a, a tihdamna a la awm lo. Natna hrik inthlah pung zel tur danna damdawi ART erawh hi chu hmuhchhuah tawh a ni a. Positive nih inhriat a t̃anga a hma thei ang bera ART lak nghal a t̃ha ber. Positive ten a hun takah an ei zat zat a nih chuan hun rei tak dam t̃ha pangngai takin a awm theih. Dam khua chuan sei phah ve mahse, ART nena dam chhung ni hmang reng tawh tur nih hi erawh ngaih mai ai hian phurrit a tling tho.
- 3) HIV/AIDS hi kan hmelhriat t̃an tirhah a runthlak em avangin tun thleng hian Positive te hian hmun tam takah thinhrik leh endawng an la hlauh. Chuvang chuan Positive nih inhre ru inpuang ngam lo eng emaw zat an awm. An inpuan miao loh avangin ART an la thei lo va, rilru, taksa leh thlarau nun thlengin harsatna an tawh a, chutih chhung chuan natna hrikin an taksa a ei chhe reng si a. Positive an ni tih hre lo mi dang awlsam taka kai darhtu an ni thei reng bawh.
- 4) A hri kai ten Positive an nih tlangnel taka an inpuan ngamna tura khawtlang leh kohhranten hma kan lak a ngai. AIDS hi natna chi khat a ni a, a hri an kai chhan chu an sual vang emaw, an vanduai vang emaw a ni thei. Rilru, taksa leh thlarau thlenga damlo; enkawl theih, enkawl ngai, enkawltu mamawh an ni. A enkawl theitu dinhmunah kan ding a nih chuan kohhran mipuite hian kan rawngbawl na tur, kan mawhphurhna a ni tih kan hriat a, kan pawm a t̃ul.
- 5) Positive inpuang ngam lo, enkawl na pawh dawng lo, mahni a tuar ngawt ngawt te dap chhuah leh enkawl na an dawn theih nana an mahni t̃anpui theitu, mi t̃angkai ber chu Positive lo inpuang tawh te an ni. Positive inpuang tawh zingah Pathiana piantharna lawmawm tak changa, rawngbawl na kawnga t̃ahnem ngai em em eng emaw zat an awm. Chung mite chu kohhran leh khawtlang hian kan hmang t̃angkai thiam a nih chuan an thawh hlawk em em a ni.
- 6) Zu leh ruihhlo laka fihlim leh Nupa kar lova mipat hmeichhiat hman khaw loh kan chin t̃hin hi kan hnam hian kan sim a ngai. Chu chu HIV/AIDS laka kan himna tur kawngpui awm chhun a ni.

Kan Pathian thu chuan “Kei ka thianghlim si a, chuvangin, nangni pawh in thianghlim tur a ni” (Leviticus 11: 45) a ti a, kan Pathian chuan Mizo mipuite hi a pawl tlaka thianghlim turin min duh a. Kan mite kawng dika hruai tur hian Kohhran hi Pathian hmanraw pawimawh ber kan ni tih i hre thar leh ang u.